

摘藻堂四庫全書薈要

史部

欽定四庫全書叢要

史部

舊五代史卷

三十六至  
四十一

詳校官內閣侍讀臣孫球



欽定四庫全書薈要卷五千四百三十七

舊五代史卷三十六

宋門下侍郎參知政事監修國史薛居正等撰

舊唐書第十二

明宗紀二

天成元年夏四月丙午帝自興聖宮赴西宮文武百僚  
縞素于位帝服斬衰親奉攢塗設奠哭盡哀乃于柩前  
即皇帝位百官易吉服班于位帝御袞冕受冊訖百僚

稱賀丁未羣官縞素赴西宮臨以樞密使安重誨為檢  
校司空守左領軍大將軍依前充樞密使宰臣豆盧革  
等三上表請聽政從之遣使往諸道及淮南告哀辛亥  
帝始聽政于中興殿壬子西南面副招討使工部尚書  
任圜率步騎二萬六千人入見甲寅帝御文明殿受朝  
制改同光四年為天成元年大赦天下後宮內職量鴈  
一百人內官三十人教坊一百人鷹坊二十人御廚五  
十人其餘任從所適諸司使務有名無實者並停分遣

諸軍就食近畿以減饋送之勞秋夏稅子每斗先有省  
耗一升今後抵納正數其省耗宜停天下節度防禦使  
除正至端午降誕四節量事進奉達情而已自于州府  
圓融不得科歛百姓其刺史雖遇四節不在貢奉諸州  
雜稅宜定合稅物色名目不得邀難商旅租庸司先將  
繁省錢物與人迴圖宜令盡底收納以塞倖門云乙卯  
渤海國王大諲譔遣使朝貢是月北京副留守知留守  
事張憲賜死以其失守故也五月丙辰朔帝不視朝臨

于西宮宰相豆盧革進位左僕射韋說進位門下侍郎  
兼戶部尚書監修國史竝依舊平章事兖州節度使檢  
校太傅朱守殷加同平章事充河南尹判六軍諸衛事  
滄州節度使檢校太傅安元信加同平章事移鎮徐州  
邠州節度使檢校太保毛璋加同平章事以太子賓客  
鄭珏為中書侍郎兼刑部尚書同中書門下平章事以  
工部尚書任圜為中書侍郎兼工部尚書同中書門下  
平章事判三司徐州節度使李紹真貝州刺史李紹英

齊州防禦使李紹虔河陽節度使李紹奇洺州刺史李

紹能等上言前朝寵賜姓名今乞還舊內李紹虔上言

臣本姓王後移杜氏蒙前朝賜今姓名乞復本姓詔竝

可之李紹真復曰霍彥威李紹英復曰房知溫李紹虔

復曰王宴球李紹奇復曰夏魯奇李紹能復曰朱君立

青州節度使檢校太傅同平章事符習加兼侍中徐州

節度使檢校太傅霍彥威加兼侍中移鎮青州丁巳初

詔文武百僚正衙常參外五日一度內殿起居

五代會  
要天成

元年五月三日敕今後宰臣文武百官除常朝外五日一度入內起居其中書非時有急切公事請開延英不限在此  
麟州奏指揮使張延寵作亂焚剽市民已殺戮訖

戊午河陽節度使夏魯奇加檢校太傅以貝州刺史房知溫為兗州節度使以齊州防禦使王晏球為宋州節度使以洺州刺史米君立為邢州節度使己未賜文武百官一馬一驢西都知府張錢進魏王繼岌打毬馬七十二匹北京馬步都指揮使李從溫奏準詔誅宦官初莊宗遇內難宦者數百人竄匿山谷落髮為僧奔至



太原七十餘人至是盡誅于都停驛辛酉詔華州放散  
西川宮人各歸骨肉壬戌以前相州刺史北京左右廂  
都指揮使安金全為安北都護振武節度使同平章事  
甲子前西都畱守京兆尹張筠加檢校太傅充山南西  
道節度使以夔川節度使李紹文為遂州節度使以前  
鄧州畱後戴思遠為洋州節度使丁卯以金吾將軍張  
實為金州防禦使戊辰以金紫光祿大夫檢校司空趙  
在禮為滑州節度使加檢校太保制下在禮以軍情不

順為辭不之任以許州畱後陶玘為鄧州畱後以諸道  
馬步副都指揮使安審通為齊州防禦使庚午以權知  
北京軍府事邠州刺史符彥超為晉州畱後以前陳州  
刺史劉仲殷為陝州畱後癸酉以前磁州刺史劉彥琮  
為同州畱後甲戌福州節度使檢校太傅王延翰加檢  
校太尉同平章事乙亥翰林學士戶部侍郎知制誥馮  
道翰林學士中書舍人趙鳳俱以本官充端明殿學士  
端明之職自此始也

五代會要明宗初登位四方書奏  
多令樞密使安重誨讀之不曉其

文義于是孔循獻議因唐室侍讀之號  
即劉昫明學士之名命馮道等為之

丙子詔故西道

行營都招討制置等使守侍中監修國史兼樞密使郭  
崇韜宜許歸葬其世業田宅並還與骨肉及萬州司戶  
朱友謙可復護國軍節度使守太師兼尚書令河中尹  
西平王所有田宅財產並還與骨肉丁丑西都衙內指  
揮使張錢進納偽蜀主王衍犀玉帶各二條馬一百五  
十匹初莊宗遣中官向延嗣就長安之殺王衍也旋屬  
蕭牆之禍延嗣藏竄不知所之而行之資裝妓樂並為

錢所有復懼事泄故聊有此獻戊寅以樞密使安重誨  
兼領襄州節度使制下重誨之黨謂重誨曰襄州地控  
要津不可乏帥無宜兼領重誨即自陳退許之以左金  
吾大將軍張遵誨為西京副留守知留守事辛巳以衛  
尉卿李懌為中書舍人充翰林學士壬午以前蔚州刺  
史張溫為振武副留守以左右廂突陣指揮使康議誠為  
汾州刺史以左右廂馬軍都指揮使索自通為忻州刺  
史尚父吳越國王錢鏐遣使進金器五百兩銀萬兩綾

萬匹謝恩賜玉冊金印初同光季年鏐上疏密求玉冊  
金印郭崇韜進議以為不可而樞密承旨段徊受其重  
賂贊成其事莊宗即允其請至是故有貢謝甲申幽州  
節度使檢校太保李紹斌加檢校太傅同平章事復姓  
名為趙德鈞乙酉詔百官朔望入閣賜廊下食自亂離  
已前常參官每日朝退賜食于廊下謂之廊餐乾符之  
後百司經費不足無每日之賜至是遇入閣即賜之

五代

會要明宗初即位命百官五日一起居李瑋以為非設  
事請罷之惟每月朔望日合入閣賜食至是宣旨

朔聖入閣外仍五日  
一起居遂為定式

卷三十六  
六月戊子前襄州節度使李紹珙

起復依前襄州節度使仍復本姓名曰劉訓以皇子河

中禹後從珂為河中節度使百僚表賀以翰林承旨兵

部尚書知制誥盧質為檢校司空充同州節度使己丑

以吏部尚書判太常卿事李琪為御史大夫以禮部尚

書崔協為太常卿判吏部尚書銓事以御史中丞崔居

儉為兵部侍郎以太子賓客蕭頊為禮部尚書中書奏

請以九月九日皇帝降誕日為應聖節休假三日從之

故忠武軍節度使檢校太師兼尚書令齊王張全義贈  
太師以前尚書右丞崔沂為尚書左丞丙申新州畱後  
張庭裕雲州畱後高行珪竝正授本軍節度使丁酉詔  
曰四夷來王歷代故事前後各因強弱撫制互有典儀  
大蕃須示于威容即于正衙引對小蕃但推于恩澤仍  
于便殿撫懷憲府奏論禮院詳酌皆徵故實咸有明文  
正衙威容未可全廢內殿恩澤且可常行若遇大蕃入  
朝即準舊儀于正殿排比鋪陳立杖百官排班于正門

引八對見時百僚入閣班退後卻引對朝貢蕃客御史大夫李琪奏論之下禮院檢討而降是命焉戊戌樞密使安重誨加檢校太保行兵部尚書事如故以太子詹事劉岳為兵部侍郎以太子右庶子王權為戶部侍郎以太子左庶子任贊為工部侍郎庚子荆南節度使檢校太師兼尚書令南平王高季興加守太尉兼尚書令澤潞節度使檢校太傅同平章事孔勅加兼侍中汴州屯駐控鶴指揮使張諫等謀叛伏誅以樞密使孔循權



知汴州軍州事甲辰樞密使孔循加檢校太保守祕書  
監依前充使己己以祕書少監姚顗為左散騎常侍以  
太子左諭德陸崇為右散騎常侍以兵部郎中蕭希甫  
為左諫議大夫前幽州節度判官呂夢奇為右諫議大  
夫以鄴都副畱守孫岳為潁州團練使詔曰古者酌禮  
以制名懼廢于物取其難犯而易避貴於便時况徵在二  
名抑有前例以太宗文皇帝自登寶位不改舊稱時即  
臣有世南官有民部靡聞曲避止禁連呼朕猥以眇躬

託于人上止遵聖範非敢自尊應又書內所有二字但不連稱不得迴避如是臣下之名不欲與君親同字者任自改更丁未中書門下奏京城潛龍舊宅望以至德宮為名從之戊申夏州節度使開府儀同三司檢校太師兼中書令朔方王李仁福加食邑一千戶以延州畱後高允韜為延州節度使以利州節度觀察畱後張敬詢為利州節度使劔南西川節度副大使知節度使事孟知祥加檢校太傅兼侍中劔南東川節度副大使知

節度事董璋加檢校太傅壬子鳳翔節度使檢校太尉  
兼中書令李曦加檢校太師兼中書令汴州知州孔循  
奏召集謀亂指揮使趙虔已下三千人並族誅訖甲寅  
以晉州留後符彥超為北京留後以鎮州副使王建立  
為鎮州留後以右龍武統軍安崇阮為晉州留後荆南  
節度使高季興上言夔忠萬三州舊是當道屬郡先被  
西川侵據今乞卻割隸本管詔可之其夔州偽蜀先曾  
建節宜依舊除刺史

通鑑考異引十國紀年荆南史天成  
元年二月壬辰請忠夔萬州及雲安

監隸奉道莊宗許之詔命未下莊宗遇弒

秋七月

六月壬辰

王知表求三州府

明宗許之

乙卯朔以太原舊宅為積慶宮庚申契丹渤海國俱遣

使朝貢甲子詔割韓城邵陽兩縣屬同州誅滑州左右

崇牙及長劍等軍士數百人夷其族作亂故也其都校

于可洪等相次到闕亦斬于都市丁卯以偽蜀守司空

門下侍郎平章事晉國公王諧為檢校司空守陵州刺

史以號州刺史石潭為耀州團練使辛未詔諸道節度

刺史文武將吏舊進月旦起居表今後除節度留後團

練防禦使惟正至進賀表其四孟月竝且止絕甲戌中  
書門下上言宣旨令進納新授諸道判官州縣官官告  
敕牒祇應宣賜準往例除將相外竝不賜官告即因梁  
氏起例凡宣授官竝特恩賜臣等商量自兩使判官令  
錄在京除授者即于內殿謝恩便辭赴任不更進納官  
告判司主簿不合更許朝對敕下後望準舊例處分從  
之乙亥莊宗皇帝梓宮發引帝衰服臨送于樓前是日  
葬莊宗于雍陵鎮州畱後王建立奏涿州刺史劉殷肇

不受代謀叛昨發兵收掩擒劉殷肇及其黨一十三人  
見折足勘詰已卯以比部郎中知制誥楊凝式為給事  
中充史館修撰判館事以偽蜀吏部尚書楊玠為給事  
中充集賢殿學士判院事升應州為彰德軍節度仍以  
興唐軍為震州隸彰德軍宰相豆盧革貶辰州刺史韋  
說貶澠州刺史仍令所在馳驛發遣為諫議大夫蕭希  
甫疏奏故也制略曰革則縱田客以殺人說則侵鄰家  
而奪井選元亨之上第段王參之本名或主掌三司委

元隨之務局或陶鎔百里受長吏之桑田咸屈塞于平  
人互阿私于愛子任官匪當黷貨無厭謀人之國若斯  
致主之方安在既迷理亂又昧卷舒而府司案牘爰來  
諫署奏章疊至備彰醜迹深汙明庭是宜約以三章投  
之四裔其河南府文案及蕭希甫論疏並宜宣示百僚  
庚辰賜蕭希甫衣段二十匹銀器五十兩賞疏革說之  
罪也宰相鄭珣任圜再見安重誨救解革說請不復追  
行後命又三上表救解俱畱中不報辛巳以捧聖嚴衛

左廂馬步軍都指揮使李從璋領饒州刺史充大內皇城使中書門下奏條制檢校官各納尚書省禮錢舊例太師太尉納四十千後減落至二十千太傅太保元納三十千減至十五千司徒司空元納二十千減至一十千僕射尚書元納一十五千減至七千員外郎中元納一十千今納三千四百者詔曰會府華資皇朝寵秩凡需新命各納禮錢爰自近年多隳舊制遂致紀綱之地遽成廢墜之司況累條流就從減省方當提舉宜振規



繩但緣其間朔衛勲庸藩宣將佐自軍功而遷陟示恩  
澤以獎酬須議從權不在其例其餘自不帶平章事節  
度使及防禦團練刺史使府副使行軍已下三司職掌  
監務官州縣官凡關此例並可徵納其檢校官自員外  
郎至僕射祇初轉一任納錢若不改呼不在徵納仍委  
尚書省部司專切檢舉置歷逐月具數申中書門下癸  
未詔辰州刺史豆盧革可責授費州司戶參軍澱州刺  
史韋說可責授夷州司戶參軍皆員外置同正員仍令

馳驛發遣甲申又詔曰責授費州司戶參軍豆盧革夷  
州司戶參軍韋說等自居台輔累換歲華負先皇倚注  
之恩失大國變調之理朕自登宸極常委鈞衡略無謙  
遜之辭但縱貪饕之意除官受賂樹黨徇私每虧敬于  
朕前徒自尊于人上道路之譖騰不已諫臣之條疏頗  
多罪狀顯彰典刑斯舉合從極法以塞羣情尚緣臨御  
之初含弘是務特軫墜泉之慮爰施解網之仁曲示優  
恩俯寬後命革可陵州長流百姓說可合州長流百姓

仍委逐處長知所在同州長春宮判官朝請大夫檢校  
尚書禮部郎中賜紫金魚袋豆盧昇將仕郎守尚書屯  
田員外郎崇文館學士賜緋魚袋韋濤等各因權勢驟  
列班行無才業以可稱竊寵榮而斯久比行貶謫以塞  
尤違朕以纂襲之初含容是務父既寬于後命子宜示  
于特恩竝停見任昇濤即革說之子也

舊五代史卷三十六

舊五代史卷三十六攷證

唐明宗紀二西都知府張錢○張錢原本作張鏐今據  
通鑑改正

故萬州司戶朱友謙○萬州原本作萬州今據歐陽史  
改正

樞密承旨段徊○段徊九國志作段懷攷歐陽史及通  
鑑並作段徊今仍其舊

正猗威容○正猗原本訛王衛今據冊府元龜改正

是曰葬莊宗于雍陵。○雍陵原本作永陵，攷徐無黨五代史注莊宗陵名雍陵，石晉時避諱稱伊陵，原本永字誤，今改正。又莊宗葬日通鑑從哀冊文作丙子，是書從實錄作乙亥。

改王參之本名。○案王參疑有舛誤，据冊肩元龜引薛史亦作王參，今無可攷，姑仍其舊。

舊五代史卷三十六考證

欽定四庫全書薈要卷五千四百三十八

舊五代史卷三十七

宋門下侍郎參知政事監修國史薛居正等撰

唐書第十三

明宗紀三

天成元年秋八月乙酉朔日有食之有司上言莊宗廟  
室酌獻請奏武成之舞從之鄆州節度使霍彥威移鎮  
青州丁亥莊宗神主祔廟有司請桃懿祖室從之詔陵

州合州長流百姓豆盧革韋說等可並自長流後縱逢

恩赦不在原宥之限豆盧昇韋濤仍削除自前所受官

秩壬辰以久雨放百僚朝參詔天下疏理繫囚甲午汴

州奏舊管曹州乞卻歸當道從之是日詔曰承前使府

奏請判官率皆隨府除移停罷近年流例有異前規使

府雖已除移判官元安舊職起今後若是朝廷除授者

即不計使府除移如是使府奏請即皆隨府移罷舊例

藩侯帶平章事者所奏請判官殿中已上許奏緋中丞



已上許奏紫令不帶平章事亦許同帶平章事例處分  
如防禦團練使奏請判官員外郎已下不在奏緋之限  
其所奏判官州縣官並須將歷任告身隨奏至京如未  
有官假稱試攝亦奏狀內分明署出如藩鎮留後權知  
軍州事並不在奏請判官之限如刺史要奏州縣官須  
申本道請發表章不得自奏近日州使奏請從事本無  
官緒妄結虛銜不計職位高卑多是請兼朱紫不惟紊  
亂實啟撓求宜令諸道州府切準敕命處分丁酉內出

象笏三十四面賜百官之無笏者己亥帝御文明殿百  
官入閣月望如月朔之儀從新例也荆南高季興上言  
峽內三州請朝廷不除刺史幽州奏契丹寇邊詔齊州  
防禦使安審通率師禦之辛丑以前青州節度使符習  
為鄆州節度使以前華州節度使史敬鎔為安州節度  
使乙巳禁鎔錢為器仍估定生銅器價斤二百熟銅器  
斤四百如違省價買賣者以盜鑄錢論丁未樞密使院  
條奏諸道節度使刺史內有不守詔條公行科斂須行

止絕州使所納軍糧不得更邀加耗節度使刺史所置  
牙隊許于軍都內抽取便給省司衣糧況人數已多訪  
問尚有招致諸邑人多有抵罪亡命便於州府投名為  
使下元隨邀求職務凌壓平人及有力戶人于諸處行  
賂希求事務亦有州使妄稱修葺城池廨宇科賦於人  
及營私宅諸縣鎮所受州使文符如涉科斂人戶不得  
稟受州府不得賒買行人物色兼行科率已前條件州  
使如敢犯違許人陳告勘詰不虛量行獎賞宜令三京

諸道州府準此處分新授青州節度使霍彥威奏處斬  
新登州刺史王公儼及同謀拒命指揮使李謹王居厚  
等八人訖初同光中符習為青州節度使宦官楊希望  
為監軍專制軍政趙在禮之據魏州習奉詔以本軍進  
討俄而帝為亂軍所劫習即罷歸希望遣兵邀之習懼  
而還至滑州帝遣人招之習至乃從帝入汴希望聞魏  
軍亂遣兵圍守習家欲盡殺之公儼素受希望獎愛謂  
希望曰內侍宜分腹心之兵監四面守陴者則誰敢異

圖希望從之公儼乘其無備圍希望之第擒而殺之公儼遂與州將李謹等謀據州城以邀符節即令軍府飛章留己兼揚言符習在鎮人不便其政帝乃除公儼為登州刺史公儼為不時赴任即以霍彥威代符習聚兵淄州以圖進取彥威至淄州會詔使至青州告諭公儼即赴所任彥威懲其初心遣人擒公儼於北海縣與同黨斬于州東

通鑑彥威聚兵淄州以圖進取公儼懼乙未始之官丁酉彥威至青州追擒之

有司

上言莊宗祔廟懿祖祧遷準例舍故而諱新懿祖例不

諱忌日不行香從之壬子襄州節度使劉訓加檢校太  
傳以偽蜀右僕射中書侍郎平章事趙國公張格為太  
子賓客充三司副使從任圜請也九月乙卯朔詔汴州  
扶溝縣復隸許州以前絳州刺史婁繼英為薊州刺史  
充北面水陸轉運制置使乙未幸至德宮遂幸前隰州  
刺史袁建豐之第帝嘗為太原內牙親將建豐為副至  
是建豐風疾沈廢故親幸其第以撫之庚申以都官郎  
中庾傳美充三州搜訪圖籍使傳美為蜀王衍之舊僚

家在成都便於歸計且言成都具有本朝實錄及傳美  
使迴所得纔九朝實錄及殘缺雜書而已癸亥應聖節  
百僚于敬愛寺設齋召緇黃之衆於中興殿講論從近  
例也戊辰以偽蜀檢校太師兼中書令右金吾街使張  
貽範為兵部尚書致仕都官員外郎于鄴奏請指揮不  
得書契券輒賣良人從之癸酉天策上將軍湖南節度  
使開府儀同三司守太師兼尚書令楚王馬殷可檢校  
太師守尚書令兩浙節度留後靜海軍節度嶺南西道

觀察處置等使檢校太尉兼中書令錢元瓘加食邑中  
吳建武等軍節度嶺南東道觀察處置等使檢校太尉  
兼中書令錢元瓘加開府階進食邑甲戌以前代州刺  
史馬漑為左衛上將軍致仕己卯以光祿卿羅周敬為  
右金吾衛大將軍充街使辛巳以前復州刺史袁義為  
唐州刺史詔曰鳳翔節度使李曦世聯宗屬任重蕃宣  
慶善有稱忠勤顯著既在維城之列宜新定體之文是  
降寵光以隆惇叙俾煥成家之美貴崇猶子之親宜于



本名上加從字癸未文武百僚至張全義私第柩前立  
班辭以來月二日葬故也冬十月甲申朔詔賜文武百  
僚冬服緇帛有差近例十月初寒之始天子賜近侍執  
政大臣冬服帝顧謂判三司任圜曰百僚散未圜奏曰  
臣聞本朝給春冬服徧及百僚喪亂已來急於軍旅人  
君所賜未能周給今止近臣而已外臣無所賜帝曰外  
臣亦吾臣也卿宜計度圜遂與安重誨據品秩之差以  
定春冬之賜其後遂以為常右拾遺曹琮上疏內一件

百僚朔望入閣及五日內殿起居請許三署寺監官輪次轉奏封事從之刑部員外郎孔莊上言自兵興已來法制不一諸道州縣常行枷杖多不依格律請以舊制曉諭改而正之丙戌吏部侍郎盧文紀上言請内外文武臣僚每歲有司明定考校將相乞迴御筆以行黜陟疏下中書門下商量宰臣奏請施行從之丁亥雲南嵩州山後兩林百蠻都鬼主右武衛大將軍李卑晚遣大鬼主傳能何華等來朝貢帝御文明殿對之百僚稱賀

庚寅以客省使李巖領泗州防禦使以河中節度副使  
李鱗為太子賓客壬辰邠州節度使毛璋移鎮潞州巴  
州進嘉禾合穗甲午以前隰州刺史袁建豐遙領洪州  
節度使庚子幽州奏契丹平州守將偽署幽州節度使  
盧文進率戶口歸順百僚稱賀辛丑契丹遣使來告哀  
言國王按巴堅以今年七月二十七日卒詔曰朕近纘  
皇圖恭修帝道務安夷夏貴洽雍熙契丹王世預歡盟  
禮交聘問遽聞凶訃倍軫悲懷可輟今月十九日朝參

丙午以舊州山後兩林百蠻都鬼主李卑晚為寧遠將軍大渡河山前印川六姓都鬼主懷安郡王勿鄧標莎為定遠將軍丁未幽州奏盧文進所率降戶孳畜人口在平州西首尾約七十里庚戌以吏部侍郎盧文紀為御史中丞時御史大夫李琪三上表求解任故也以兵部侍郎劉岳為吏部侍郎以戶部侍郎充端明殿學士馮道為兵部侍郎以中書舍人充端明殿學士趙鳳為戶部侍郎並依前充職壬子靜江軍節度使桂州管内

觀察使檢校太師兼中書令扶風郡王馬竇加食邑實  
封澧朗觀察使檢校太傅兼侍中馬希振加檢校太尉  
盧文進至幽州遣軍吏奉表來上十一月戊午以滄州  
留後王景戡為邢州節度使青州奏得登州狀申契丹  
先攻逼渤海國自按巴堅身死雖已抽退尚留兵馬在  
渤海扶餘城令渤海王弟領兵馬攻圍扶餘城內契丹  
次己未以翰林學士尚書戶部郎中知制誥劉昫為中  
書舍人充職辛酉以前祕書少監溫輦為太子詹事丞

成以前房州刺史朱罕為潁州團練使是日詔曰應令  
日已前修蓋得寺院無令毀廢自此已後不得輒有建  
造如要願在僧門並須官壇受戒不得衷私剃度癸丑  
日南至帝御文明殿受朝賀仗衛如式禮部侍郎裴皞  
上言諸州刺史經三考方請替移詔曰有政聲者就加  
恩澤無課最者即便替移密州獻芝草庚午河陽節度  
使夏魯奇移鎮許州留後梁漢顥為邠州節度使淮南  
楊溥遣使貢獻賀登極乙亥以前振武留後張溫為利

州昭武軍留後以果州刺史孫鐸為漢州刺史充西川

馬步軍都指揮使壬午靜海軍節度安南管内觀察等

使檢校太尉兼侍中錢元球加開府階進食邑癸未鎮

州奏準詔盧文進所率歸業戶口蠲放租稅三年仍每

口給糧五斗十二月戊子盧文進及將吏四百人見賜

鞍馬玉帶衣被器玩錢帛有差詔曰朕中興寶祚復正

皇綱萬國駢羅俱在照臨之內八紘遼夏咸居覆載之

間矧彼雲南素歸正朔洎平偽蜀思錫舊恩于乃睠以

雖深欲需臯而未暇百蠻都首領李卑晚六姓蠻都首  
領勿鄧標莎等天資智勇世稟忠勤梯杭之道路纔通  
琛賁之貢輸已至率其種落竭乃悃誠備傾向化之心  
深獎來庭之意今則各頒國寵別進王封其舊州刺史  
李及大鬼主離吠等或遙貢表函或躬趨朝闕亦宜特  
授官資各遷階秩勉敦信義無墜冊書示爾金石之堅  
保我山河之誓欽承休命永保厥終壬辰帝狩於近郊  
臘故也甲午以契丹盧龍軍節度使盧文進為檢校太



尉同平章事充滑州節度使戊戌詔嚴禁鑼錢庚子皇  
第二子金紫光祿大夫檢校司徒從榮可檢校太保同  
平章事天雄軍節度使鄴都留守以武安軍馬步軍都  
指揮使馬希範為澧州刺史鐵林都知兵馬馬希杲為  
衡州刺史壬寅潁州刺史孫岳加檢校太保獎能政也  
丙午中書門下奏故事藩鎮節度觀察使帶平章事于  
都堂上事刊石記壁合納禮錢三千貫以充中書及兩  
省公使令欲各納禮錢五百千于中書立石亭子鐫勒

宰臣使相官氏授上年月餘充修葺中書及兩省公署  
部堂什物從之庚戌御史臺奏京城坊市士庶工商之  
家有婢僕自經投井非理物故者近者已來凡是死亡  
皆是臺司左右巡舉勘檢施行已久仍恐所差人吏及  
街市胥徒同於民家因事邀脅臣訪詢故事凡京城民  
庶之家死喪委府縣檢舉軍家委軍巡商旅委戶部然  
諸司檢舉後具事由申臺其間或枉濫情故臺司訪聞  
即行舉勘如是文武兩班官吏之家即是臺司檢舉臣

請自今已後並準故事施行者詔曰今後文武兩班及諸道商旅凡有喪亡即準臺司所奏施行其坊市民庶軍士之家凡死喪及婢僕非理物故依臺司奏委府縣軍巡同檢舉乃不得縱其吏卒于物故之家妄有邀脅或恐暑月屍柩停若待申聞檢舉縱無邀脅亦須經時日今後仰本家喚四鄰檢察若無他故遂便葬埋如後別聞枉濫妄有保證官中訪知勘詰不虛本戶鄰保並行科罪如聞諸道州府坊市死喪取分巡院檢舉頗

致淹傳人多流怨亦仰約京城事例處分

舊五代史卷三十七

欽定四庫全書薈要卷五千四百三十九

舊五代史卷三十八

宋門下侍郎參知政事監修國史薛居正等撰

唐書第十四

明宗紀四

天成二年春正月癸丑朔帝御明堂殿受朝賀仗衛如  
常儀制曰王者祇敬宗祧統臨寰宇必順體元之典特  
新制義之文朕以眇躬獲承丕構襲三百年之休運繼

二十聖之耿光馭朽納隍夕惕之心罔怠法天師古日  
躋之道惟勤今則載戢干戈渾同書軌荷玄穹之睠祐  
契兆庶之樂推檢玉泥金非敢期于薄德耕田鑿井誠  
有慕于前王將陳享謁之儀即備郊丘之禮宜更稱謂  
永耀簡編今改名為亶凡在中外宜體朕懷宣制訖百  
僚稱賀有司告郊廟社稷丙辰詔端明殿學士班位宜  
在翰林學士之上今後如有轉改只于翰林學士內選  
任先是端明殿學士班在翰林學士之下又如三館之例

官在職上趙鳳轉侍郎日諷宰相府移之既而禁林序

列有不可之言安重誨奏行此敕時論便之癸亥宰臣

鄭珏加特進門下侍郎兼太微宮使崇文館大學士任

圜加光祿大夫門下侍郎監修國史以端明殿學士尚

書兵部侍郎馮道為中書侍郎平章事集賢殿大學士

以太常卿崔協為中書侍郎平章事戊辰以前鄧州節

度使劉玘卒廢朝左拾遺李同上言天下繫因請委長

吏逐旬親自引問質其罪狀真虛然後論之以法庶無

枉濫從之辛未皇子河中節度使從珂加同平章事以  
鎮州畱後檢校司徒王建立為鎮州節度使檢校太傅  
癸酉皇第三子金紫光祿大夫檢校司徒從厚加檢校  
太保同平章事河南尹判六軍諸衛事北面副招討房  
知溫奏營州界奚陀羅支內附乙亥以監門衛大將軍  
傅璉為右武衛上將軍丙子詔曰頃自本朝多難雅道  
中微皆尚浮華罕持廉讓其有除官蘭省命秩柏臺或  
以人事相疎或以私讎見訝稍乖敬奉遽至棄捐益司



長之振威處君恩而何地今後應新授官朝謝後可準  
例上事司長不得輒以私事阻滯其本官亦不得因遭  
抑挫託故請假戊寅皇子從厚領事于河南府宰相鄭  
珏已下會送非例也已卯樞密使光祿大夫檢校太保  
行兵部尚書安重誨加開府儀同三司檢校太傅兼侍  
中樞密使檢校太保守秘書監孔循加檢校太傅同平  
章事詔崇文館依舊為弘文館初同光中宰相豆盧革  
以同列郭崇韜父名弘希其意奏改之今乃復焉辛巳

詔曰亂離斯久法制多隳不有舉明從何禁止起今後  
三京及州使職員名目是押衙兵馬使騎馬得有暖坐  
諸都軍將衙官使下繫名糧者只得衣紫皂庶人商旅  
只著白衣此後不得參雜兼有富戶或投名于勢要以  
求影庇或希假于攝貴以免丁徭仰所在禁勘以肅奸  
欺二月壬午朔新羅遣使朝貢丁亥以北京皇城使李  
繼朗為龍武大將軍北京都指揮使從臻為左衛大將  
軍捧聖都指揮使李從瑑為右監門衛大將軍戊子

以前北面水陸轉運招撫使守冀州刺史烏震領宣州  
節度使庚寅陝州節度使檢校司徒石敬瑭加檢校太  
傅兼六軍諸衛副使壬辰西川節度使孟知祥奏泗州  
防禦使充西川兵馬都監李嚴煽搖軍衆尋已處斬以  
潁州刺史孫岳為耀州團練使丙申以從馬直指揮使  
郭從謙為景州刺史尋令中使誅之夷其族以其首謀  
大逆以弑莊宗也以尚書左丞崔沂為太子少保致仕  
壬寅制曰荆南節度使開府儀同三司守太尉兼尚書

令南平王高季興可削奪官爵仍令襄州節度使劉訓  
充南面招討使知荆南行府事許州節度使夏魯奇為  
副招討使統蕃漢馬步四萬人進討以其叛故也又命  
湖南節度使馬殷以湖南全軍會合以東川節度使董  
璋充東南面招討使新授夔州刺史西方鄴為副招討

使共領川軍下峽州三面齊進

通鑑攷異梓夔皆在荆  
南之西南而云東南面

者蓋據夔梓  
所向言之

甲辰充州節度使房知溫加同平章事宗

州節度使王晏球加檢校太傅丁未以禮部尚書蕭頊

為太常卿戊申以御史大夫李琪為右僕射以太子賓  
客李璘為戶部尚書以吏部侍郎李德休為禮部尚書  
以前吏部侍郎崔貽孫為吏部侍郎以端明殿學士戶  
部侍郎趙鳳為兵部侍郎依前充職庚戌詔諸道節度  
使男及親嫡骨肉未沾恩命者特許上聞河南府新安  
縣宜為次亦以雍陵在其界故也辛亥以刑部侍郎歸  
藹為戶部侍郎三月壬子朔以中書舍人馬縞為刑部  
侍郎辛會節園宰相樞密使及在京節度使共進錢絹

請開宴癸丑遣供奉官賈俊使淮南甲寅以西川節度副使李敬周為遂州武信軍留後乙卯開府儀同三司司徒致仕趙光逢可太保致仕仍封齊國公以武信軍節度使李紹文卒廢朝丙辰宰臣判三司任圜奏諸道藩府請依天復三年已前許貢綾絹金銀隨其土產折進馬之直又請選孳生馬分置監牧竝從之

五代會要任圜奏三

京留守請道節度觀察諸州防禦使刺史每年應聖節及正至等節貢奉或討伐勝捷各進獻馬伏見本朝舊事雖以獻馬為名多將綾絹金銀折充馬價蓋跋涉之際護養稍難因此羣方俱為守制自今後伏乞除蕃部

進駝馬外諸州所進馬許依天復三年已前事例隨其  
土產折進價直冀貢輸之稍易又識敬之獲申兼欲于  
諸處揀孳生馬準舊制分置監牧仍委三司使別具制置奏聞太常丞段顥請國學五

經博士各講本經以申橫經齒胄之義從之庚申以前  
澤潞節度使檢校太傅兼侍中孔勣為河陽節度使壬  
戌辛甘水亭甲子青州節度使霍彥威加檢校太尉兼  
中書令以大內皇城使守饒州刺史李從璋為應州節  
度使丁卯詔所在府縣糾察殺牛賣肉犯者準條科斷  
其自死牛卽許貨賣肉斤不得過五錢鄉村民家死牛

但報本村所由準例輸皮入官癸酉以戶部郎中知制誥盧詹為中書舍人夏四月辛巳朔房知溫奏前月二十一日盧臺戍軍亂害副招討寧國軍節度使烏震尋與安審通斬殺亂兵訖帝聞之廢朝一日贈震太傅新羅國遣使貢方物丁亥以華州晉後劉彥琮為本州節度使是日幸會節園宴近臣己丑以兵部侍郎崔居儉權知尚書左丞以戶部侍郎王權為兵部侍郎以禮部侍郎裴臯為戶部侍郎以翰林承旨守中書舍人李愚



為禮部侍郎充職庚寅御史臺奏今月三日廊下餐百  
官坐定兩省官方來自五品已下輒起詔曰每赴部餐  
如對御宴若行私禮是失朝儀各罰半月俸

五代會要  
長興三年

五月詔文武兩班每遇入閣賜食從前御史臺官及諸  
朝官皆在數政門外兩廊食從前御史數政門內別坐  
既為隔門各不相見致行坐不齊雖于肅整今後每遇  
入閣賜食北省官亦宜于數政門外東廊下設席以北  
首為上待  
班齊就坐 詔盧臺亂軍龍旺所部鄴都奉節等九指揮

三千五百人在營家口骨肉並可全家處斬龍旺所部  
之衆即梁故魏博節度使楊師厚之所招置也皆天下

雄勇之士目其都為銀槍効節僅八千人師厚卒賀德  
倫不能制西迎莊宗入魏從征河上所向有功莊宗一  
統之後雖數頒賚而驕衆無厭同光末自貝州劫趙在  
禮據有魏博及帝繼位在禮冀脫其禍潛奏願赴朝覲  
遂除皇子從榮為帥乃令北禦契丹是行也不支甲冑惟  
幟于長行表隊伍而已故俛首遙征在途聞李嚴為孟  
知祥所害以為劒南阻絕互相煽動及屯于盧臺會烏  
震代房知溫為帥轉增浮說震與房知溫博于東寨日

亭午大譟于營外知溫上馬出門為甲士所擁且曰不  
與兒郎為主更何處去知溫紿之曰馬軍皆在河西步  
卒獨何為也遂得躍馬登舟濟于西岸安審通戢騎軍  
不動知溫與審通謀伺便攻之令亂兵卷甲南行騎軍  
徐進部伍嚴整叛者相顧失色列炬宵行疲于荒澤遲  
明潛令外州軍別行知溫等遂擊亂軍橫尸于野餘衆  
復趨舊寨至則已焚之矣翼日盡戮之脫于叢草溝塍  
者十無二三迨夜竄于山谷稍奔于定州及王都之敗

乃無雅類矣癸巳兗州節度使房知溫加侍中齊州防禦使安審通加檢校太傅並賞盧臺之功也丁酉偽吳楊溥遣移署右威衛將軍雷現貢端午禮幣辛丑以前利州節度使張敬詢為雲州節度使遣樞密使孔循赴荆南城下時招討使劉訓有疾故也甲辰以戶部侍郎韓彥暉為秘書監是日幸石敬瑭安重誨第丙午故振武節度使李嗣恩贈太尉以司封郎中充樞密院直學士閻至為左諫議大夫充職右諫議大夫梁文矩上言

平蜀已來軍人剽略到西川人口甚多骨肉阻隔恐傷和氣請許收認帝仁慈素深因文矩之奏詔河南河北舊因兵火擄隔者並從識認是日郢州進白鵲五月癸丑以福建畱後檢校太傅舒州刺史王延鈞為檢校太師守中書令充福建節度使琅邪郡王以太常卿蕭頊為吏部尚書是日懷州進白鵲戊午以三司副使守太子賓客張格卒廢朝以翰林學士駕部郎中知制誥竇夢徵為中書舍人充職癸亥遣宣徽使張延朗調發

郡縣糧運赴荆南城下仍以軍法從事以右龍武統軍  
崔公實為左龍武統軍以前復州刺史高行周為右龍  
武統軍割果州屬郡乙丑偽吳楊溥貢新茶滄州進白  
鶴庚午詔罷荆南之師既而令軍士散掠居民而廻詔  
文武臣僚及諸道節度刺史有父母在者各與恩澤宰  
臣任園表辭三司事乃以樞密院承旨孟鵠充三司  
副使權判六月壬午華州邢州進兩岐麥兗州進三足  
烏丙戌宰相任園落平章事守太子少保丁亥詔天下

除併無名額寺院以宣徽北院使張延朗為右武衛大將軍判三司依前宣徽使檢校司徒辛卯大理少卿王鬱上言凡決極刑準敕合三覆奏近年已來全隳此法伏乞今後決前一日許一覆奏從之壬辰南面招討使知荊州南行府事襄州節度使檢校太傅劉訓責授檢校右僕射守檀州刺史訓南征無功故有是譴詔喪葬之家送終之禮不得過度乙未戶部尚書李璘上言請朝班自四品已上官各許薦令錄兩人五品官各薦簿

尉兩人功過賞罰與舉者同受其禍福詔從之其所舉人仍于官告內標所舉姓名或有不公連坐舉主仍令三品已上各舉堪任兩使判官者丙申以天策上將軍湖南節度使開府儀同三司檢校太師守尚書令楚王馬殷為守太師尚書令封楚國王庚子辛白司馬坡祭突厥神從北俗之禮也秋七月庚戌朔以宋州節度使王晏球充北面行營副招討使癸丑以左金吾將軍烏昭遠為左衛上將軍充入蠻國信使中書奏馬殷封楚國



王禮文不載國王之制請約三公之儀用竹冊從之壬戌西川節度副大使知節度事孟知祥加檢校太尉兼侍中東川董璋加爵邑以左効義指揮使元習為資州刺史右効義指揮使盧密為雅州刺史癸亥辛冷泉宮甲子以檢校工部尚書謝洪為宿州團練使夔州刺史西方鄴奏殺敗荆南賊軍收峽內三州丙寅升夔州為寧江軍以鄴為節度使戊辰詔曰頃因本朝親王遙領方鎮遂有副大使知節度事年代已深相沿未改其東川

西川今後落副大使只云節度使庚午遂州留後李敬  
周鄜州留後劉仲殷並正授本州節度使壬申兗州節  
度使房知溫移鎮徐州徐州節度使安元信移鎮襄州  
滄州節度使趙在禮移鎮兗州以齊州防禦使安審通  
為滄州節度使是日詔陵州合州長流百姓豆盧革韋  
說等宜令逐處刺史監賜自盡其骨肉並放逐便是日  
逐段凝于遼州劉訓于濮州溫韜于德州甲戌太子少  
保任圜上表乞致仕仍于外地尋醫詔從之丁丑以左

金吾大將軍曹廷隱為齊州防禦使八月己卯朔日有  
食之辛巳以右諫議大夫孔昭序為給事中以祕書少  
監崔慄為右諫議大夫壬午以右驍衛大將軍劉衡為  
左領衛上將軍以鄴都副畱守趙敬怡為右衛上將軍  
判興唐府事乙酉昆明大鬼主羅殿王普露靜王九部  
落各差使隨牂牁青州八郡刺史宋朝化等一百五十  
三人來朝進方物各賜官告繒綵銀器放還蕃丙戌以  
御史中丞盧文紀為工部尚書以左諫議大夫梁文矩

為御史中丞鄧州留後陶玘貶嵐州司馬以其為內鄉  
縣令盛歸仁所訟稅外科率故也仍賜歸仁緋袍魚袋  
癸巳幸皇子從榮第宣禁中伎樂觀宴從榮進馬及器  
幣帝因以伎樂賜之華州上言渭河泛濫害稼丁酉以  
吏部郎中襲文宣公孔邈為左諫議大夫史館修撰趙  
熙上言應內中公事及詔書奏對應不到中書者請委  
內臣一人抄錄月終送史館詔差樞密直學士錄送青  
州進芝草新州奏契丹乞置互市癸卯汴州節度使朱

守殷加兼侍中鄆州節度使符習加檢校太尉甲辰皇子從榮娶鄆州節度使劉仲殷女是夕禮會百僚表賀九月辛亥義武軍節度使檢校太尉兼中書令王都加食邑實封幽州節度使趙德鈞加檢校太尉鎮州節度使王建立加同平章事偽吳楊溥遣使以應聖節貢獻已未以前雲州節度使高行珪為鄆州節度使是日出御札曰歷代帝王以時巡狩一則遵乎禮制一則按察方區矧彼夷門控茲東夏當先帝戡平之始為眇躬殿

守之邦俗尚貞純兵懷忠勇自元臣鎮靜庶事康和兆  
民咸樂于有年闔境彌堅于望幸事難違衆義在省  
方朕取十月七日親幸汴州庚申以衛尉卿李延光  
為大理卿北京留守李彥超上言先父存審本姓符氏  
蒙武皇賜姓乞卻還本姓從之乙丑夏州節度使李仁  
福鳳翔節度使李從暉朔方節度使韓洙並加食邑改  
賜功臣以汝州防禦使趙延壽為河陽節度使以比部  
郎中知制誥劉贊為中書舍人以河陽掌書記程遜

為比部員外郎知訓誥以代州刺史李德琬為蔚州刺史丙寅樞密使孔循兼東都留守襄州夏魯奇上言荆南高季興遣使持書乞修貢奉詔魯奇不納詔諸州錄事參軍不得兼使府賓職已已鄧州節度使史敬鎔加檢校太保同州節度使盧質加檢校司徒御史臺奏每遇入閣舊例只一員侍御史在龍墀邊祇候彈奏公事或有南班失儀點檢不及今欲依常朝例差殿中侍御史二員押鐘鼓樓位仍各綴供奉班出入從之以青州

節度副使淳于晏為亳州團練使契丹遣使美稜瑪古  
已下朝貢戊寅西川奏據黎州狀雲南使趙和于大渡  
河南起舍一間留信物十五籠并雜賤詩一卷遞至闕  
下冬十月己卯朔帝御文明殿視朝癸未亳州刺史李  
鄴貶郴州司戶又貶崖州長流百姓所在賜自盡判官  
樂文紀配祁州責其違法黷貨也乙酉駕發西京詔留  
宰相崔協以奉祠祭丁亥帝宿于滎陽汴州朱守殷奏  
都指揮使馬彥超謀亂已處斬訖戊子次京水知朱守



殷反帝親統禁軍倍程前進翼日至汴州攻其城拔之  
守殷伏誅丙申磁州刺史藥縱之上言今月十二日供  
奉官王仁鎬至稱制殺太子少保致仕任圜契丹遣使  
持書求碑石欲為其父表其葬所戊戌詔曰諸道州府  
自同光三年已前所欠秋夏稅租并主持務局敗闕課  
利并治河舟船折欠天成元年殘欠夏稅竝特與除放  
時重誨既構任圜之禍恐人非之思沛恩于衆以掩已  
過乃奏曰三司積欠約二百萬貫虛繫帳額請竝蠲放

帝重違其意故有是詔時議者以獨隔年之賦猶或惠  
民場院課利一槩除之得不啓奸倖之門乎已亥詔曰  
太子少保致仕任園早推動舊會委重難既退免于劇  
權俾優閑于外地而乃不遵禮分潛附守殷緘題罔避  
于嫌疑情旨頗彰于怨望自收汴壘備見蹤由若務含  
弘是孤典憲尚全大體止罪一身已令本州私第自盡  
其骨肉親情僕使等竝皆放罪辛丑詔曰后來其蘇動  
必從于人欲天監厥德靜宣布于國恩近者言幸浚郊

暫離洛邑蓋逢歲稔共樂時康不謂奸臣遽彰逆狀為  
厲之階既甚覆宗之禍自貽俾我生靈遘茲紛擾永言  
軫惻無輟寐興宜覃雨露之恩式表雲雷之澤應汴州  
城內百姓既經驚劫宜放二年屋稅諸處有曾受逆人  
文字者隨處焚毀應天下見禁囚徒除十惡五逆殺人  
放火劫盜合造毒藥官典犯賊偽行印信屠牛外罪無  
輕重竝從釋放應有民年八十已上及家長者有廢疾  
者免一丁差役云以山南西道節度使張筠為西京畱

守行京兆尹青州節度使霍彥威差人走馬進箭一對  
賀誅朱守殷帝卻賜彥威箭一對傳箭蕃家之符信也  
起軍令衆則使之彥威本非蕃將以臣傳箭于君非禮  
也癸卯以權知汴州事陝州節度使石敬瑭為汴州節  
度使兼六軍諸衛副使侍衛親軍馬步都指揮使鳳翔  
秦地震丙午威武軍節度副使檢校太尉守建州刺史  
王延亶可同平章事守建州刺史充奉國軍節度副使  
兼威武軍節度副使詔割施州卻屬黔南十一月己酉

帝祭蕃神于郊外庚戌以皇城使行袁州刺史李從敏  
為陝州節度使乙卯青州霍彥威鄆州符習來朝以太  
子詹事溫輦為吏部侍郎徐州房知溫來朝戌平黔南  
節度使李紹義加檢校太保庚申皇子河中節度使檢  
校太保同平章事從珂鄴都畱守檢校太保同平章事  
從榮河南尹判六軍諸衛事檢校太保同平章事從厚  
竝加檢校太傅進爵邑貝州刺史竇廷琬上言請制置  
慶州青白兩池逐年出絹十萬匹米萬石詔升慶州為

防禦所以廷琬為使壬申詔霍彥威等歸藩詔太宗朝  
左僕射李靖可冊贈太保鄭州僕射陂可改為太保陂  
時議者以僕射陂者後魏孝文帝賜僕射李冲故因以  
為名及是命之降以為李靖蓋誤也契丹遣使摩琳等  
來乞通和十二月戊寅朔以前鳳翔畱後高允貞為右  
監門上將軍詔以施州為夔州屬郡以其便近故也遣  
飛勝指揮使于契丹賜契丹王錦綺銀器等兼賜其母  
繡被纓絡已卯蔚州刺史周令武得代歸闕帝問北州

事令武奏曰山北甚安諸蕃不相侵擾鴈門已北東西數千里斗粟不過十錢帝悅顧謂左右曰須行善事以副天道居數日帝延宰臣于玄德殿言及民事馮道奏曰莊宗末年不撫軍民惑于聲樂遂致人怨國亂陛下自膺人望歲時豐稔亦淳化所致也更願居安思危帝然之許州地震庚辰皇子鄴都留守從榮移鎮太原以北京留守符彥超為潞州節度使乙酉以彰國軍節度使李從璋昧于政理詔歸闕敕新及第進士有聞喜宴

逐年賜錢四十萬己丑兗州節度使趙在禮來朝詔出  
潛龍宅米以賑百官壬辰以太傅致仕齊國公趙光逢  
卒輟朝丙申許州節度使夏魯奇移鎮遂州庚子辛石  
敬瑭公署及康義誠私第甲辰狩于東郊臘也丙午追  
尊四廟以應州舊宅為廟

舊五代史卷三十八



舊五代史卷三十八攷證

唐明宗紀四遺供奉官賈俊使淮南 賈俊九國志作

賈進攷冊府元龜所引薛史亦作俊今仍其舊

房知溫奏前月二十一日盧臺戍軍亂害副招討寧國

軍節度使烏震尋與安審通斬殺亂兵訖 案五代

春秋盧臺戍軍亂房知溫討平之據是書房知溫傳

及通鑑知溫初誘戍軍為亂繼恐事不濟乃與安審

通謀討亂兵也五代春秋所書殊非事實

五品官各薦簿尉兩人 案五代會要作五品六品官  
各許薦簿尉兩人

所舉姓名或有不公 案原本脫公字今據五代會要  
增入

夔州刺史西方鄴奏殺敗荆南賊軍收峽內三州 案  
通鑑六月西方鄴敗荆南水軍於峽中復取夔忠萬  
三州是書繫七月甲子蓋以奏聞之日為據歐陽史  
與是書同

詔陵州合州長流百姓豆盧革韋說等宜令逐處刺史  
監賜自盡 案五代春秋作元年七月殺豆盧革韋  
說攷歐陽史元年七月貶豆盧革為辰州刺史韋說  
澶州刺史甲申流革于陵州說于合州二年七月殺  
豆盧革韋說與是書同五代春秋統繫于元年誤也  
今月十二日供奉官王仁鎬至稱制殺太子少保致仕  
任圜 案安重誨害任圜五代春秋及通鑑俱不書  
日歐陽史作乙未殺太子少保致仕任圜據是書作

十二日是年十月為己卯朔十二日乃庚寅也與歐  
陽史異日

美稜瑪古舊作梅老沒骨今改 摩琳舊作梅老今改

舊五代史卷三十八考證

欽定四庫全書薈要卷五千四百四十

舊五代史卷三十九

宋門下侍郎參知政事監修國史薛居正等撰

唐書第十五

明宗紀五

天成三年春正月戊申朔帝禦崇元殿受朝賀仗衛如式辛亥前河陽節度使檢校太傅兼侍中孔勅以太子太傅致仕癸丑詔取今月十七日辛鄴都甲寅以國子

祭酒朱守素卒廢朝丙辰以鎮南軍節度使袁建豐卒  
廢朝詔贈太尉丁巳詔曰朕聞堯舜有恤刑之典貴務  
好生禹湯申罪已之言庶明知過今月十七日據巡檢  
軍使渾公兒口奏稱有百姓二人以竹竿習戰鬥之事  
朕初聞奏報實所不容率爾傳宣令付石敬瑭處置今  
旦重誨敷奏方知悉是幼童為戲載聆謹議方覺失刑  
循揣再三愧惕非一亦以渾公兒誑誣頗甚石敬瑭詳  
覆稍乖致人枉法而殂處朕有過之地今減常膳十日

以謝幽寃其石敬瑭是朕懿親合施極諫既茲錯誤宜示省循可罰一月俸渾公兒決眷杖二十仍銷在身職銜配流登州小兒骨肉賜絹五十匹粟麥各百石便令如法埋葬兼此後在朝及諸道州府凡有極刑並須仔細裁遣不得因循百寮進表稱賀已未中書門下奏國

子祭酒望令宰相兼判乃詔崔協判之

五代會要載原奏云祭酒之資

虛朝所責爰從近代下重此官况屬聖朝方勤庶政須弘雅道以振時風望令宰臣一員兼判國子祭酒辛

酉以前潞州節度使毛璋為右金吾上將軍以左驍衛

上將軍華溫琪為右金吾大將軍以春州刺史張虔到  
為鄭州防禦使時契丹方陷平州癸亥詔應廟諱文字  
只避正文其偏旁文字不用虧缺點畫契丹遣使特蘇  
巴摩琳等貢獻帝遣指揮使奔托山押國信賜契丹王  
妻戊辰以隨駕馬軍都指揮使富州刺史康義誠兼領  
鎮南軍節度使以隨駕步軍都指揮使潮州刺史楊漢  
章遙領寧國軍節度使中書上言舊制遇二月十五日  
立元皇帝降聖節休假三日準會昌元年二月勅休假



一日請準近勅從之吐蕃伊埒雅遜等六人回鶻米里  
都督等四人並授歸德懷遠將軍悉放還蕃庚午冊贈  
故瀛州刺史李嗣願為太尉壬申冊贈故皇子檢校司  
空從諲為太保甲戌制以楚國夫人曹氏為淑妃以韓  
國夫人王氏為德妃仍令所司擇日冊命二月丁丑朔  
有司上言太陽合虧既而有雲不見群官表賀詔巡幸  
鄴都宜停庚辰偽吳楊溥遣使貢獻賀誅朱守殷帝以  
荆南拒命通連淮夷不納其使遣還壬午以光祿卿韋

寂卒廢朝贈禮部尚書癸未工部尚書盧文紀貶石州  
司馬員外安置文紀私諱業時新除于鄴為工部郎中  
舊例寮屬名與長官諱同或改其任文紀素與宰相崔  
協有隙故中書未議改官于鄴授官之後文紀自請連  
假鄴尋就位及差延州官告使副未行文紀叅告且言  
候鄴迴日終請換曹鄴其夕自經而死故文紀貶官以  
倉部郎中何澤為吏部郎中獎伏閣諫巡幸鄴都也丁  
亥天德軍節度使郭承豐加檢校司徒辛卯以山南西

道節度使張筠為左驍衛上將軍詔中外羣臣父母亡  
沒者竝與追封贈癸巳以禮部尚書崔貽孫卒輟朝甲  
午以吐渾寧朔奉化兩府都知兵馬使李紹魯為吐渾  
寧朔府都督乙未以樞密使兼東都留守孔循為許州  
節度使兼東都留守鄧州節度使高行珪移鎮安州應  
州節度使李從璋移鎮滑州滑州節度使盧文進移鎮  
鄧州丁酉以責授檀州刺史劉訓為右龍武大將軍已  
亥回鶻可汗仁喻遣都督李阿爾珊等貢獻壬寅以左

金吾大將軍羅周敬為同州節度使甲辰以威塞軍節  
度使張廷裕卒廢朝詔贈太保以耀州團練使孫岳為  
閬州團練使以左監門上將軍高允貞為右金吾衛大  
將軍以右金吾衛大將軍華溫琪為左金吾衛大將軍  
三月丁未朔以久雨為災詔文武百辟極言時政得失  
丁巳以邢州節度使王景戡為華州節度使以前北京  
副留守李從溫為邢州節度使己未以宰臣鄭珣為開  
府儀同三司左僕射致仕加食邑五百戶庚辰以前復

州刺史翟章為新州威塞軍留後中書奏孟夏薦饗合  
宰相行事在朝只有宰相二員今東都留守孔循帶平章  
事宜令攝太尉行事孔循稱使相有戎機不當司祠祭  
重事癸亥以前鎮州節度使王建立為右僕射兼中書  
侍郎平章事集賢殿大學士判三司西方鄴上言收復  
歸州以前鄭州刺史楊漢賓為洋州武定軍留後戊辰  
以前彰國軍節度副使陳臯為鳳州武興軍留後以前  
蔡州刺史孫漢韶為應州彰國軍留後以宣徽南院使

范延光為樞密使以宣徽北院使判三司張延朗為宣徽南院使以前冀州刺史婁繼英為耀州團練使以懷州刺史張廷蘊為金州防禦使已已命范延光權知鎮州軍府事西方鄴奏于歸州殺敗荆南賊軍數千人時有太白山道士解元龜自西川至對于便殿稱年一百一歲既而上表乞西都留守兼西川制置使要修西京宮闕帝謂侍臣曰此人老耄自遠來朝方期別有異見反為身名甚可笑也賜號為知白先生賜紫放歸山甲

戊冊回鶻可汗仁諭為順化可汗夏四月戊寅以汴州  
節度使石敬瑭為鄴都畱守充天雄軍節度使加同平  
章事以樞密使權知鎮州軍府事檢校太保范延光為  
鎮州節度使兼北面水陸轉運使以司農卿鄭績為太  
僕卿壬午夔州節度使東南面副招討使西方鄴加檢  
校太保甲申皇第三女石氏封永寧公主第十三女趙  
氏封興平公主仍令所司擇日冊命幽州上言契丹有  
書求樂器乙酉達靼遣使朝貢以隨駕馬軍都指揮使

康義誠為侍衛親軍馬步軍都指揮使丙戌樞密使安

重誨兼河南尹以皇子河南尹判六軍諸衛事從厚為

汴州節度使判六軍如故丁亥復州奏湖南大破淮賊

于道人磯以西川馬步軍都指揮使趙廷隱兼漢州刺

史從益知詳之請也

九國志趙廷隱傳知祥至蜀康延孝陷漢州遣廷隱率兵擊破之擒

廷孝檻送闕下知祥奏加檢校司空漢州刺史遂留屯成都

洋州上言重開入蜀舊

路三百餘里比今官路較二十五程而近癸巳殿中少

監石知納貶憲州司戶坐煽惑軍鎮也北面副招討宋



州節度使王晏球以定州節度使王都反狀聞庚子制  
義武軍節度使檢校太尉兼中書令太原王王都削奪  
官爵壬寅以王晏球為北面行營招討使知定州行軍  
州事以滄州節度使兼北面行營馬軍都指揮使安審  
通為副招討使兼諸道馬軍都指揮使以左散騎常侍  
蕭希甫兼判大理卿事西京奏前樞密使張居翰卒五  
月己巳朔回鶻可汗仁諭封順化可汗丁未鄴都留守  
天雄軍節度使石敬瑭河陽節度使趙延壽並加駙馬

都尉以右僕射李琪為太子少傅辛亥沙州節度使曹  
義金加爵邑王晏球上言收奪得定州北西二關城癸  
丑湖南馬殷奏二月中大破淮寇二萬生擒將士五百  
人中書上言諸道薦人總與不可全阻又難今後節度  
使每年許薦二人帶使相者許薦三人團練防禦使各  
一人節度觀察判官並聽旨授書記已下即許隨府從  
之以六軍判官尚書司封郎中史主為右諫議大夫充  
樞密直學士詔州縣官以三十月為考限刺史以二十

五月為限以到任日為始己未幽州奏契丹託諾領二千騎西南趣定州以前同州節度使盧質行兵部尚書判太常卿事辛酉以天雄軍節度副使判興府事趙敬怡為樞密使詔曰上柱國勲之極也近代已來文臣官階稍高便授柱國歲月未深便轉上柱國武資初官便授上柱國今後凡加勲先自武騎尉十二轉方授上柱國永作成規不令踰越丁卯鎮州奏今月十八日王師不利于新樂壬申王晏球奏今月二十一日大破定州

賊軍及契丹于曲陽斬獲數千人王都與塔納以數十騎復入于定州六月己卯以右金吾上將軍毛璋為左金吾上將軍以前安州節度使史敬鎔為右金吾上將軍以前華州節度使劉彥琮為左武衛上將軍壬午放內園鹿七頭于深山乙酉皇子故金槍指揮使檢校左僕射從璟贈太保己丑幽州趙德鈞奏殺契丹千餘人于幽州東獲馬六百匹壬辰宰臣馮道率百寮上表請上尊號曰聖明神武文德恭孝皇帝詔報不允丙申馮

道等再上尊號不允戊戌以西京副留守知留守事張  
遵誨行京兆尹秋七月乙巳詔故偽蜀主王衍追封順  
正公以諸侯禮葬丙午以前武信軍節度使李敬周為  
邠州節度使丁未以滄州節度使安審通卒于師輟朝  
壬子以朔方節度使韓洙卒廢朝甲寅王晏球奏六月  
二十二日進攻逆城將士傷者三千人時晏球知城中  
有備未欲急攻朱宏昭張虔釗切于立功促攻賊壘晏  
球不得已而進兵遂致傷瘕者衆乙卯以太子少保李

茂勲卒輟朝已未詔弛趨禁許民間自造于秋苗上納  
徵趨價畝五錢時孔循以趨法殺一家于洛陽或獻此  
議以為愛其人便于國故行之宗正卿李紓除名刑部  
侍郎馬縞貶綏州司馬刑部員外郎李愼儀貶階州司  
戶初李紓差攝陵臺令張保嗣等各虛稱試銜為奉先  
令王延朗所訟大理寺斷以詐假官論刑部詳覆稱非  
詐假大理執之名兩司廷議刑部理屈故有是貶紓續  
勅配隴州徒一年未幾詔曰天下府州例是攝官皆結

試銜或因勘窮便關詐假已前或有稱試銜一切不問  
此後並宜禁止曹州刺史成景宏貶絳州司戶叅軍續  
勅長流宥州尋賜自盡坐受本州倉吏錢百緡也壬戌  
齊州防禦使曹廷隱以奏舉失實配流永州續勅賜自  
盡甲子王晏球奏今月十九日契丹七千騎來援定州  
王師逆戰于唐河北大破之追至滿城又破之斬二千  
級獲馬千匹戊辰福建節度使王延鈞可依前檢校太  
師守中書令進封閩王己巳王晏球奏此月二十一日

追契丹至易州掩殺四十里擒獲甚衆故朔方節度使  
韓洙贈太尉以兵部侍郎王權御史中丞梁文矩並為  
吏部侍郎以左諫議大夫呂夢奇為御史中丞八月癸  
酉朔以翰林學士守中書舍人李憚劉昫並為戶部侍  
郎充職以吏部侍郎劉岳守祕書監以吏部侍郎韓彥  
惲守禮部尚書以戶部侍郎韓藹守太子賓客以戶部  
侍郎裴皞守兵部侍郎以中書舍人張文寶守刑部侍  
郎詔凡有姓犯廟諱者以本望為姓丁丑以檢校尚書



石僕射守龍武大將軍劉訓為晉州節度使檢校太傅  
壬午幽州趙德鈞奏于府西邀殺契丹敗黨數千人生  
擒首領特哩衮及其屬凡五十餘人是時官軍襲殺契  
丹屬秋雨繼降泥濘莫進人饑馬乏散投村落所在村  
民持白梃毆殺之德鈞出兵接于要路惟奇峯嶺北有  
馬潛遁脫者數十餘無噍類帝致書諭其本國辛卯以  
朔方軍留後韓璞為朔方軍節度使靈武雄警甘肅等  
州觀察使檢校司徒帝聞隨鄧復郛均房之民父母骨

肉有疾以長竿遙致粥食而餉之出嫁女夫家不遣來  
省疾乃下詔委長吏嚴加禁察房州奏新開山路四百  
里南通夔州畫圖以獻以前洋州節度使戴思遠為太  
子太保致仕庚子詔今後翰林學士入院以先後為班  
次承旨一員不計官資先後在學士之上閏月丁未兩  
浙節度觀察畱後清海軍節度使檢校太師兼中書令  
錢元瓘可杭州越州大都督府長史充鎮東鎮海等軍  
節度使戊申趙德鈞獻戎俘于闕下其蕃將特哩袞等

五十人畱于親衛餘契丹六百人皆斬之乙卯升楚州

為順化軍以明州刺史錢元珣為本州節度使以吏部

尚書蕭頊為太子少保契丹遣使來貢獻契丹平州刺

史張希崇上表歸順乙丑陝州節度使李從敏移鎮滄

州以宣徽南院使張延朗為陝州節度使詔在京遇行

極法日宜不舉樂兼減常膳諸州遇行極法日禁聲樂

己巳滑州掌書記孟昇匿母服大理寺斷處流特勅孟

昇賜自盡觀察使觀察判官錄事參軍失其糾察各行

殿罰襄邑縣民聞威父為人所殺不雪父冤有狀和解  
特勅處死是月二十七日大水河水溢絳州地震九月乙  
亥以捧聖左右廂副都指揮使索自通為雲州節度使  
丁丑以太府卿判四方館事李郁為宗正卿壬午以晉  
州節度使安崇阮為左驍衛上將軍甲申吐蕃回紇各  
遣使貢獻壬辰宰臣王建立進玉杯上有文曰傳國萬  
歲孟乙未詔德州流人溫韜遼州流人段凝嵐州司戶  
陶玘憲州司戶石知納原州司馬聶興並宜賜死于本

處暴其宿惡而誅之也丙申以邠州節度使梁漢顯為  
右威衛上將軍丁酉河陽節度使駙馬都尉趙延壽為  
檢校司徒己亥詔徐州節度使房知溫兼荆南行營招  
討使知荆南行府事冬十月甲辰制瓊華長公主孟氏  
可冊為福慶長公主丙午以滄州節度使李從敏兼北  
面招討使戊申帝臨軒命禮部尚書韓彥輝工部侍郎  
任贊往應州奉冊四廟詔汾州節度使李敬周攻慶州  
以刺史竇廷琬拒命故也戊午契丹平州刺史張希崇

已下八十餘人見于元德殿頒賜有差突厥首領張慕  
進等來朝貢甲子安州節度使高行珪奏屯駐左神捷  
左懷順軍士作亂已逐殺出城詔升壽州為忠正軍戍  
辰以雲州節度使索自通領壽州節度使以前雲州節  
度使張溫復為雲州節度使庚午夜西南有彗星長丈  
餘在牛星五度十一月癸酉日南至帝御崇元殿受朝  
賀甲戌捧聖指揮使何福進招收到安州作亂兵士五  
百人自指揮使已下至節級四十餘人並斬餘衆釋之

壬午房知溫奏荆南高季興卒中書舍人劉贊奏請節  
度使及文班三品已上謝見通喚從之是日以契丹所  
署平州刺史光祿大夫檢校太保張希崇為汝州刺史  
加檢校太傅已丑中書奏今後或有封冊請御正衙從  
之青州奏節度使霍彥威卒輟朝三日詔宰臣王建立  
權知青州軍州事庚寅禮部員外郎和凝奏應補齋郎  
並須引驗正身以防偽濫舊例使蔭一任官補一人今  
後改官須轉品即可如無子許以親姪繼限念書十卷

試可則補從之甲午以尚書左僕射同平章事集賢殿

大學士判三司王建立為青州節度使檢校太尉同平

章事丙申帝謂侍臣曰古鐵券如何趙鳳對曰帝王誓

文許其子子孫孫長享爵祿帝曰先期所賜惟朕與郭

崇韜李繼麟三人爾崇韜繼尋已族滅朕之危疑慮在

旦夕于是嗟嘆久之趙鳳曰帝王執信故不必銘金鏤

石矣吏部郎中何澤奏流外官請不試書判之類從之

吐蕃遣使朝貢戊戌前安州節度副使范延榮並男皆



斬于軍巡獄為高行珪誣奏故也十二月壬寅朔詔真  
定府屬縣宜準河中鳳翔例升為次畿真定縣升為次  
赤甲辰邠州節度使李敬周奏收下慶州刺史竇廷琬  
族誅

舊五代史卷三十九

欽定四庫全書薈要卷五千四百四十一

舊五代史卷四十

宋門下侍郎參知政事監修國史薛居正等撰

唐書第十六

明宗紀六

天成四年春正月壬申朔帝御崇元殿受朝賀仗衛如儀幽州節度使趙德鈞奏臣孫贊年五歲默念論語孝經舉童子于汴州取解就試詔曰都尉之子太尉之孫

能念儒書備彰家訓不勞就試特與成名宜賜別勅及  
第附今年春榜戊子放元年應欠秋稅以左衛上將軍  
安崇阮為黔南節度使壬辰迴鶻入朝使徹伯爾等五  
人各授懷化司戈放還以北京副留守馮贇為宣徽使  
判三司戊戌禁天下虛稱試攝銜西川孟知祥奏支屬  
刺史乞臣本道自署二月乙巳王晏球奏此月三日收  
復定州獲王都首級生擒契丹託諾等二千餘人百寮  
稱賀已畢乃詔取今月二十四日車駕還東京辛亥以

北面行營招討使宋州節度使王晏球為鄆州節度使  
加兼侍中以北面行營副招討使滄州節度使李從敏  
為定州節度使以北面行營兵馬都監鄭州防禦使張  
虔釗為滄州節度使幽州節度使趙德鈞加兼侍中乙  
卯以樞密使趙敬怡權知汴州軍州事丙辰邢州奏定  
州送到偽太子李繼陶已處置訖辛酉帝御咸安樓受  
定州俘馘百官就列宣露布于樓前禮畢以王都首級  
獻于太社王都男四人弟一人託諾父子二人並磔于

市

五代會要尚書兵部宣露布于樓前宣訖尚書刑部侍郎張文寶奏曰逆賊王都首級請付所司大理卿

蕭希逋受之以出獻于郊社其

時露布之文類制勅之

王都男并蕃將等礫于開封橋

體蓋執筆者悞頗為識者所嗤樞密使趙敬怡卒贈太

傅以端明殿學士趙鳳權知汴州軍州事甲子車駕發

汴州丙寅至鄭州賜左僕射致仕鄭珏錢二十萬丁卯

宰相崔協卒詔贈尚書右僕射東都留守太子少傅李

琪等奏至偃師縣奉迎時琪奏章中有敗契丹之凶黨

破真定之逆城之言詔曰契丹即為凶黨真定不是逆

城李琪罰一月俸庚午車駕至自汴州三月甲戌馮道  
進表乞命相丙戌詔皇城使李從璨貶授房州司戶參  
軍仍令盡命從璨帝之諸子也先是帝巡幸汴州留從  
璨以警大內從璨因遊會節園酒酣戲登御榻安重誨  
奏之故置于法焉壬辰中書奏今後羣臣內有乞假覲  
省者請量賜茶藥從之乙未以前鄆州節度使符習為  
汴州節度使丙申詔鄴都幽鎮滄邢易定等州管內百  
姓除正稅外放免諸色差配以討王都之役有輓運之

勞也夏四月庚子朔禁鐵鑼錢壬寅重脩廣壽殿成有司請以丹漆金碧飾之帝曰此殿經焚不可不修但務宏壯不勞華侈湖南奏敗荆南賊軍于石首鎮詔沿邊置場買馬不許蕃部直至闕下先是党項諸蕃凡將到馬無駕良並云上進國家雖約其價以給之及計其館穀錫賚所費不可勝紀計司以為耗蠹中華遂止之壬子以皇子北京留守河東節度使從榮為河南尹判六軍諸衛事以皇子河南尹判六軍諸衛事從厚以為北



京留守以河陽節度使趙延壽為宋州節度使以侍衛  
親軍都指揮使鎮南軍節度使康義誠為河南節度使  
契丹寇雲州癸丑契丹遣紐赫美稜等復率其屬來朝  
貢稱取託諾等骸骨並斬于北市甲寅以端明殿學士  
趙鳳為門下侍郎兼工部尚書平章事丙辰諫議大夫  
致仕襲文宣公孔邈卒庚申以王建立孔循帶中書直  
省吏歸藩並追迴壬戌幽州節度使趙德鈞兼北面行  
營招討使鎮州節度使范延光加檢校太傅戊辰中書

奏五月一日應在京九品已上官及諸道進奉使請準  
貞元七年勅就位起居永為恒式從之五月己巳朔帝  
御文明殿受朝丙子以夔州節度使西方鄴卒輟朝丁  
丑大理卿李保殷卒己卯以忠武軍節度使索自通為  
京兆尹充西京留守以左威衛上將軍朱漢賓為潞州  
節度使乙酉以黔州節度使安崇阮為夔州節度使以  
左驍衛上將軍張溫為洋州節度使以黔州留後楊漢  
賓為本州節度使中書奏大常寺定少帝諡昭宣光烈

孝皇帝廟號景宗伏以少帝今不入廟難以言宗只云  
昭宣光烈孝皇帝從之丁亥以鳳州武興軍留後陳皋  
為武興軍節度使以新州威塞軍留後翟璋為威塞軍  
節度使壬辰以權知尚書右丞崔居儉為尚書右丞詔  
葺天下廨宇丙辰襄州奏荆南高從誨乞歸順雲州奏  
契丹犯塞六月辛丑以左散騎常侍姚顗為兵部侍郎  
壬寅夔州節度使楊漢章移鎮雲州以北京馬步軍都  
指揮使兼欽州刺史張敬達為鳳州節度使癸卯以前

西京副留守事張遵誨行衛尉事充客省使國子博士  
田敏請葺四郊祠祭齋室丙午以沂州刺史張萬進為  
安北都護充振武軍節度使戊申以宿州團練使康思  
立為利州節度使登州刺史孫元停任坐在任無名科  
率故也詔鄴都仍舊為魏府應魏府汴州益州宮殿悉  
去鵠尾賜節度使為衙署辛亥以權知朔方軍留後定  
難軍都知兵馬使韓澄為朔方留後癸丑以前潞州節  
度使符彥超為左驍衛上將軍詔諸道節度使行軍司

馬名位雖高或師臣不在其州事宜委節度副使權知  
又詔藩郡所請賓幕及主事親從者悉以名聞丙辰權  
知荆南軍府事高從誨上章首罪乞修職貢仍進銀三  
千兩贖罪壬戌幸至德宮詔京城空地課人蓋造如無  
力者許人請射營構秋七月庚午以前西京留守判官  
張鎔為司農卿壬辰貶前左金吾上將軍毛璋為儒州  
長流百姓尋賜自盡以其在藩鎮陰蓄奸謀故也甲戌  
御史中丞呂夢奇責授太子右贊善大夫坐曾借毛璋

馬故也已卯以工部侍郎任贊為左散騎常侍以樞密  
直學士左諫議大夫充匭使閤至為工部侍郎充職遂  
州進嘉禾一莖九穗壬午以給事中判大理卿事許光  
義為御史中丞史館上言所編修莊宗一朝事迹欲名  
為實錄太祖獻祖懿祖名為紀年錄從之

五代會要天  
成三年十二

月史館奏據左補闕張昭遠狀嘗讀國書伏見懿祖昭  
烈皇帝自元初獻祖文皇帝于太和之際立功王  
室陳力國朝太祖武皇帝自咸通後來勤王戮力剪平  
多難頻立大功三換節旄再安京國莊宗皇帝終平大  
患奄有中原倘闕編修遂成湮墜伏請與當館修撰參  
序條綱撰太祖莊宗實錄四年七月監修國史趙鳳奏

奉勅修懿祖憲祖太祖莊宗四帝實錄自今年六月一日起手旋其進呈伏以凡關纂述務合品題承乾御宇之君行事方云實錄追尊冊號之帝約文祇可紀年所修前件史書今欲自莊宗一朝名為實錄其太祖以上並目為紀年錄從之

甲申以前荆南行軍司馬檢校太傅高從誨

起復授檢校太傅兼侍中充荆南節度使丙戌涇州節

度使李從昶移鎮華州以冀州刺史李金全為涇州節

度使戊子中書奏今後新及第舉人有曾授正官及御

署者欲約前任資序與除一官從之壬辰詔取來年二

月二十一日有事于南郊八月丁酉朔大理正路阮奏

切見春秋釋奠于文宣王而武成王廟久曠時祭請復  
常祀從之戊戌中書奏太子少傅李琪所撰進霍彥威  
神道碑文不分真偽是混功名望令改撰從之琪梁之  
故相私懷感遇叙彥威在梁歷任不欲言偽梁故也辛  
丑詔亂離已來天下諸軍所掠生口有主識認即勒還  
之以前清河縣令襲鄆國公食邑三千戶楊仁矩為祕  
書丞御史臺奏主簿朱穎是前中丞奏請合隨廳罷任  
詔曰主簿既為正秩況入選門顯自朝恩合終考限宜



令仍舊守官甲辰以宰臣馮道為南部大禮使兵部尚書盧質為禮儀使御史中丞許光義為儀仗使兵部侍郎姚顗為鹵簿使河南尹從榮為橋道頭遞使客省使衛尉卿張遵誨為修裝法物使乙巳黑水朝貢使郭濟來朝授歸德司戈放還蕃丁未以翰林學士承旨禮部侍郎知制誥李愚為兵部侍郎職如故以中書舍人盧詹為禮部侍郎以兵部侍郎裴皞為太子賓客吐渾首領念公山來朝貢戊申帝服袞冕御文明殿追冊昭宣

光烈孝皇帝庚戌以宰臣監修國史趙鳳兼判集賢院  
事以左散騎常侍任贊判大理卿事己未高麗王王建  
遣使貢方物辛酉詔準待例節度使帶平章事侍中中  
書令並列銜于勅牒側書使字今錢鏐是元帥尚父與  
使相名殊馬殷守太師尚書令是南省官資不合署勅  
尾今後勅牒內並落下乙卯党項首領朝貢甲子幸金  
真觀改賜建法大師賜紫尼智願為圓惠大師即武皇  
夫人陳氏也丙戌蒙古來朝貢京城內有南州北州乃

張全義光啟中所築至是詔許人依街巷請射城濠任  
使平填蓋造屋宇九月丁卯中書奏據宗正寺申懿祖  
永興陵獻祖長寧陵太祖建極陵並在代州鴈門縣皇  
帝追尊四廟在應州金城縣詔應州升為望州金城鴈  
門並升為望縣辛未太常博士段顥奏切見大祠則差  
宰相行禮中祠則卿監行事小祠則委太祝奉禮並不  
差官今後請差五品官行事從之癸巳制天下兵馬元  
帥尚父吳越國王錢鏐可落元帥尚父吳越國王授太

師致仕責無禮也先是上將軍烏昭遇使于兩浙以朝廷事私于吳人仍目鏐為殿下自稱臣謁鏐行拜蹈之禮及迴使副劉玟具述其事故停削鏐官爵令致仕烏昭遇下御史臺尋賜自盡後有自浙中使還者言昭遇無臣鏐之事為玟所誣人頗以為冤乙未詔諸道通勘兩浙綱運進奉使並下巡獄冬十月丙申朔併吏部三銓為一銓宜令本司官員同商量注擬連署申奏仍不得于私第注官戊戌以襄州兵馬都監守磁州刺史康

福為朔方河西等節度使靈威雄警涼等州觀察使時朔方將吏請帥于朝廷故命康福往鎮之庚子以右金吾上將軍史敬鎔為左金吾上將軍以左驍衛上將軍符彥超為右金吾上將軍以前黔州節度使李承約為右驍衛上將軍以雲州節度使張敬詢為右驍衛上將軍以前華州節度使王景戡為右驍衛上將軍癸卯太常少卿蕭愿責授太子洗馬奪緋愿南郊行事與祠官同飲詰旦猶醉不能行禮為御史所劾也詔新授朔方

節度使康福將兵萬人赴鎮己酉制復故荆南節度使  
高季興官爵辛亥升閬州為保寧軍壬子以內客省使  
左衛大將軍李仁矩為閬州節度使辛七星亭丙辰夏  
州進白鷹重誨奏曰夏州違詔進貢臣已止約帝曰善  
朝退帝密令左右進馬是日幸龍門十一月丁卯洛州  
水暴漲壞居人垣舍戊辰以刑部侍郎張文寶為右散  
騎常侍己巳以尚書右丞李光序為刑部侍郎癸酉升  
曹州濟陰縣為次赤以昭宣光烈孝皇帝溫陵所在故

也甲戌奉國軍節度使王延稟加兼侍中從福建節度

使王延鈞請也車駕出近郊試夏州所進白鷹戒左右

勿令重誨知己卯日南至帝御文明殿受朝賀癸未祕

書少監于嶠配振武長流百姓永不齒任為宰臣趙鳳

誣奏也史官張昭遠等以新修獻祖懿祖太祖紀年錄

共二十卷莊宗實錄三十卷上之賜器帛有差

五代會要監修

趙鳳修撰張昭遠呂咸  
休各賜繒綵銀器等

十二月丁酉靈武康福奏破野

利大蟲兩族三百餘帳于方渠獲牛羊三萬戊戌詔應

授官及封贈官誥舉人冬集等所費用物一切官破土  
成中書奏今後宰臣致齋內不押班不知印不赴內殿  
起居或遇國忌行事官已受誓戒宜不赴行香并不奏  
刑殺公事大祠致齋內請不開宴每遇大忌前一日請  
不坐朝從之

舊五代史卷四十